



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.238/2025

Paneli Zgjedhor për Ankesa dhe Parashtresa (PZAP), i përbërë nga gjyqtarët: Kujtim Pasuli - kryesues, Hajriz Hoti dhe Ramush Bardiqi - anëtarë, duke vendosur përkritazi me ankesat e subjektit politik Lëvizja Vetëvendosje (LVV), me seli në Prishtinë kundër subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore për Kuvendin e Republikës së Kosovës, që do të mbahen më datë 09 Shkurt 2025, në seancën e panelit të mbajtur me 30.01.2025, mori këtë:

V E N D I M

Refuzohen si të pabazuar ankesat Anr.238/2025, dhe Anr.239/2025, e datës;29.01.2025, të parashtruara nga Subjekti Politik, Lëvizja Vetëvendosje (LVV), me seli në Prishtinë, të paraqitur kundër Subjektit Politik, Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025.

A r s y e t i m

Me datë 29.01.2025 PZAP ka pranuar ankesën Anr.238/2025 nga subjekti politik Lëvizja Vetëvendosje (LVV), me të cilën pretendon se më datë 28.01.2025 aktivistë të Lëvizjes Vetëvendosje në Istog ka identifikuar banerin/posterin e vendosur në hapësirat/rrugët publike të kandidatit për deputetë nga radhët e LDK-së Besim Mulaj në rreth rrotullimin e rrugës publike "Skënderbeu", në Istog.

Me datë 29.01.2025 PZAP ka pranuar ankesën Anr.239/2025 nga subjekti politik Lëvizja Vetëvendosje (LVV), me të cilën pretendon se më datë 28.01.2025, aktivistë të Lëvizjes Vetëvendosje në Istog ka identifikuar banerin/posterin e vendosur në hapësirat/rrugët publike të kandidatit për deputetë nga radhët e LDK-së, Besim Mulaj në shtyllën e dedikuar për vendosjen e emërtimit të rrugës në rrugën publike "Lidhja e Prizrenit", në Istog.

Sipas parashtruesit të ankesave me këtë veprim kandidatët dhe subjekti politik LDK kanë bërë shkelje të nenit 34, paragrafi 1 nën paragrafi 1.2, të Ligjit Nr.08/L-228 për Zgjedhjet e Përgjithshme në Republikën e Kosovës-LZP, ku parashihet se *“Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose ne hapësirat private pa lejen e pronareve ose shfrytëzuesve.”*

Si provë ka bashkangjitur, fotografi që dëshmon vendosjen e banerit/posterit në kundërshtim me LZP.

Më datë 29.01.2025, PZAP-i, e njoftoi subjektin politik Lidhja Demokratike e Kosovës (LDK) për ankesën e paraqitur kundër tyre, duke i dërguar kërkesë për përgjigje deri më 30.01.2025 në ora 13:00.

Në përgjigje në ankesë të paraqitur me datë 30.01.2025, subjekti politik Lidhja Demokratike e Kosovës (LDK) ka kundërshtuar ankesën e paraqitur nga subjekti Lëvizja Vetëvendosje (LVV) dhe i njëjti thekson e për vendosjen e posterit në rrugët e lartcekura si në ankesë për të njëjtat kane pëlqimin për shfrytëzimin e hapësirës publike të lëshuar nga drejtoria për Planifikim Urban dhe Mjedis e Komunës së Istogut. Si dëshmi ka bashkangjitur pëlqimet e lëshuara nga Komuna e Istogut.

Paneli, në kuptim të nenit 9 paragrafi 5, nën paragrafi 5.5 të Rregullores Nr.01/2024, për Procedurat e Parashtrimit dhe Vendosjes së Ankesave të PZAP-it, dhe nenit 84 paragrafi 1 të Ligjit Nr.05/L-031, për Procedurën e Përgjithshme Administrative, me qëllim të ekonomizimit të procedurës, ka bashkuar ankesat A.nr.238/2025, dhe A.nr.239/2025 të paraqitura me datë 29.01.2025, dhe janë trajtuar me një vendim, andaj procedimi i këtyre ankesave evidentohen nën shenjën e përbashkët A.nr.238/2025, për shkak të natyrës së njëjtë të çështjeve të parashtruara nga subjekti i njëjtë politik LVV kundër subjektit të njëjtë politik LDK, si për nga përmbajtja ashtu edhe për nga kërkesat e paraqitura të ankesave.

PZAP, pasi që shqyrtoj dhe vlerësoi ankesat vëren se të njëjta janë të pa bazuara.

Paneli pas shikimit të shkresave të lëndës dhe përgjigjes në ankesë të paraqitur nga Subjekti Politik LDK, vlerësoj se pretendimet e Subjektit Politik LVV, janë të pa qëndrueshme dhe si të tilla i refuzoj për faktin se veprimet e përshkuara në ankesë nuk paraqesin shkelje të dispozitës së nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *“Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose ne hapësirat private pa lejen e pronareve ose shfrytëzuesve.”*

Parashtruesi i ankesës i referohet shkeljes së dispozitës ligjore të lartcekur, mirëpo paneli në bazë të shkresave të bashkangjitura në përgjigje në ankesë, përkatësisht, Pëlqimet e lëshura nga

Drejtoria e Shërbimeve Publike të Komunës së Istogut, nr.11/351-1562/11, të datës 20.01.2025, mbi shfrytëzimin e përkohshëm të hapësirave publike, konkretisht shfrytëzimin e hapësirës publike për vendosjen e reklamave në rrugën “Skenderbeu” dhe rruga “Lidhja e Prizrenit” në Istog, për vendosjen e posterave, vërteton faktin se posterat e kandidatit për deputet, Besim Mulaj, nga radhët e Subjektit Politik, Lidhja Demokratike e Kosovës, janë vendosur pasi që për vendosje ka marrë leje nga Drejtoria përkatëse e Komunës së Istogut për vendosjen e posterëve në hapësira publike, dhe mbi këtë bazë paneli vlerëson se veprimet e subjektit politik nuk janë në kundërshtim me Rregulloren Zgjedhore Nr.07/2024, të Drejtat dhe Obligimet e Subjekteve Politike gjatë Fushatës Zgjedhore, lidhur me Ligjit Nr.08/L-228, për Zgjedhjet e Përgjithshme në Republikën e Kosovës.

Andaj duke u mbështetur në nenin 117.3 të LZP-së ku përcaktohet se “vendosja për ankesat nga PZAP-ja mbështetet në dëshmi të qarta dhe bindëse”, Paneli vlerësoj se pretendimet e tilla janë të pa qëndrueshme dhe si të tilla i refuzoj, për faktin se nga veprimet e përshkruara në ankesat nga parashtruesi i ankesave nuk paraqesin shkelje të dispozitave të lartcekura, dhe të njëjtat i refuzoi si të pabazuar.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 të LZP-së, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.238/2025 më datë 30.01.2025

Kryesuesi i Panelit
Kujtim Pasuli



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.